

Berbakti kepada ibu bapa tuntutan wajib

Benarlah kata orang tua, se-orang ibu mampu menjaga 10 orang anak dan anak yang ramai itu belum tentu mampu menjaga ibu bapa mereka.

Sempena Hari Ibu yang akan disambut Ahad ini seharusnya kita menilai pengorbanan ibu bapa dalam membesarkan anak yang tidak ternilai harganya. Apa salahnya anak menjaga dan menatang mereka bagai minyak yang penuh seperti mereka menjaga anak ketika kecil dahulu. Agama Islam jelas menuntut kita sebagai anak, wajib menjaga dan berbakti kepada ibu bapa lebih

lebih lagi yang sudah lanjut usia.

Kewajipan menjaga, berbakti kepada ibu bapa

Dalam hadis yang diriwayatkan Bukhari dan Muslim, Ibnu Umar berkata: "Saya bertanya kepada Nabi Muhammad SAW: "Apakah perbuatan yang disukai oleh Allah?" lalu Baginda menjawab: "Sembahyang pada waktunya." Kemudian apa? Tanya saya lagi. Baginda menjawab: "Berbakti kepada kedua-dua ibu bapa." Saya tanya lagi. Jawab Baginda: "Berjihad ke jalan Allah."

Oleh itu, sebagai seorang anak, wajib menjaga dan berbakti ke-

pada ibu bapa tanpa rasa mengeluh dan lelah untuk menunjukkan pengorbanan yang sudah mereka berikan.

Menjaga ibu bapa yang sakit ketika diambang maut dan juga

FAKTA NOMBOR

33,077
orang

warga tua di pusat jagaan pada tahun 2013

menguruskan jenazah mereka adalah antara tanggungjawab anak yang dituntut Islam. Bagaimanapun, hari ini ramai anak yang menghantar ibu bapa mereka ke rumah kebajikan atau membiarkan sahaja mereka sendirian.

Bilangan warga tua di pusat jagaan meningkat

Dalam kajian Jabatan Kebajikan Masyarakat (JKM), bilangan warga tua di pusat jagaan pada tahun 2012 berjumlah 28,729 dan meningkat sehingga 33,077 pada tahun 2013.

Hal ini menunjukkan jumlah warga tua atau ibu bapa yang dihantar ke pusat jagaan oleh anak semakin meningkat saban tahun.

Cuba kita renungkan hadis riwayat Tabrani ini: "Bukanlah daripada golongan kamu, sesiapa yang tidak menghormati orang tua kami dan tidak pula mengasihi anak kecil kami."

Dalam sebuah hadis lain, Nabi Muhammad SAW memberi peringatan kepada kita dalam menjaga adab dan berkasih sayang dengan ibu bapa. Sesungguhnya budaya menghormati dan mengasihi ibu bapa akan mewujudkan suasana harmoni, damai dan tenang dalam keluarga.

Ingatlah, reda Allah terletak pada reda kedua-dua ibu bapa dan syurga kita terletak di bawah telapak kaki ibu.

Nor Ezzati Ahmad Tarmizi
Universiti Sains Islam Malaysia